

李文忠公奏稿

李文忠公奏稿

卷之十六目錄

與羅淑亞定議辦結教案摺

同治九年正月初二日

遵旨援黔籌陳大略摺

同治九年正月十三日

援黔籌撥餉需片

同治九年正月十三日

請裁蜀軍騰餉援黔片

同治九年正月十三日

湖北汛兵裁留改撥摺

同治九年二月初二日
附清單

奉旨援陝酌籌派撥摺

同治九年二月三十日

籌辦援陝軍糧片

同治九年二月三十日

籌購駝隻片

同治九年二月三十日

起程赴陝日期摺

同治九年三月二十一日

潘鼎新丁憂片

同治九年三月二十一日

江蘇釐金充餉請加中額摺

同治九年三月二十一日

西捻肅清彙保摺

同治九年三月二十二日

馮桂芬請加三品卿銜片

同治九年三月二十二日

覆議獎案部章片

同治九年三月二十二日

遵派勁旅先行赴陝摺

同治九年四月二十二日

采糧購駝情形片

同治九年四月二十二日

援黔協餉改協援陝片

同治九年四月二十二日

行抵潼關籌糧議勦摺

同治九年五月二十四日

調郭寶昌赴陝片

同治九年五月二十四日

遵旨帶軍赴直摺

同治九年七月初五日

質訊津案辦法片

同治九年七月初五日

請飭劉銘傳幫辦軍務片

同治九年七月初五日

籌辦轉運並催協餉片

同治九年七月初五日

袁保恆赴直效力片

同治九年七月初五日

譚仁芳所部留陝片

同治九年七月初五日

勦軍報捐欠餉請廣四川學額片

同治九年七月初五日

周盛傳北山疊勝摺

同治九年七月十四日

分路進兵片

同治九年七月十四日

行抵直境分兵邊界摺

同治九年八月初四日

調任直隸謝摺

同治九年八月初六日

布置後路擬暫駐保定片

同治九年八月初六日

起程赴津並陳教案情形摺

同治九年八月十九日

分撥駝隻片

同治九年八月十九日

請撤古北口馬隊摺

同治九年九月十九日

劉銘傳請

陛見片

同治九年九月二十九日

李文忠公奏稿卷十六

全集一之十六

桐城吳汝綸編錄

與羅淑亞定議辦結教案摺

同治九年正月初二日

奏爲法國使臣羅淑亞駛至漢口臣由川境聞信趕回與之商辦定議該使已啟程取道樊城回京恭摺仰祈

聖鑒事竊西陽教案擬議辦結並遵義一案請責成地方官紳妥籌議結緣法使帶兵船來鄂卽馳回勸阻等因業於十二月初二日專摺附片馳報在案臣當將西陽案內未完事情及遵義籌辦大略分別緘咨川省將軍總督及黔中地方官酌量辦理均已定有規模適接湖北江漢關道鄭蘭探稟法使羅淑亞由九江赴南昌臘月二十日內外前來漢口等語臣遂於十二月初六日自重慶起程登舟順流東下二十日後行過荊州聞羅淑亞已抵漢

口正與撫臣郭柏蔭辨論酉陽等案臣卽星夜兼程馳回於二十
六日抵鄂是日該使果已派法國副領事狄隆同主教梅西滿坐
輪船派江迎臣詢知梅主教甫回漢口將臣在渝議辦各節稟告
公使意見微有參差漢關道鄭蘭江蘇護送道員姚曦等卽帶同
副領事狄隆主教梅西滿來見謂該使以西陽教案雖已辦結尙
未足意必須請示定奪如不見允仍要入川另議等情當呈出該
使續擬節略所指案中各犯仍照原議罪名並無加增惟膠執
前說與張佩超不肯甘心既欲逐出酉境仍另索五年罰賠有據
之尼欠銀一萬二千兩臣與再四辨駁因思前在重慶曾督同川
東道錫珮知州田秀栗面諭張玉璞回家傳知伊父張佩超既與
該處教堂積有仇怨以後斷難相安不如設法遷移他所以備兩
全臣並密囑錫珮等隨時諄飭酌辦但未明告該主教耳至酉陽

教堂據錫珮田秀栗等僉稱目擊規製因歷非他處教堂可比該
主教前索賠銀五萬兩尙非甚多臣先斷給銀一萬八千兩另飭
籌一萬二千兩以作墊給張佩超欠款藉資貼補明知彼族惟利
是圖不得不加以裁抑當據錫珮等稟稱梅西滿允收完案但云
張佩超舊欠難以抵算須再與范主教商定等語茲梅西滿赴漢
愬懇公使出頭索賠亦在意料之中臣卽面告以前次斷給銀票
兩項共三萬兩原謂兩案並了今羅使必將已收票銀專爲賠堂
及撫卹被害教民之用而張佩超舊案尾欠另行著追只能照約
由地方官隨時代催斷不能由官籌墊該公使遠道來此本爲川
黔兩案起見旣相諄囑應咨商川省轉飭妥辦二十七日關道鄭
蘭臬稱該使聞領事等回覆允爲轉咨意甚欣悅請照會完案伊
卽不再入川臣復據情酌給照會並咨四川將軍臣崇實督臣吳

案分別辦理以便該使迅速折回免致另生枝節旋接羅淑亞來函定於二十八日由漢口起程取道樊城回京與關道等稟報相符至湖北天門教案業經郭柏蔭督同鄭蘭等辦結奏報有案該使並無異詞貴州遵義一案該使令狄隆梅西滿面呈節略請爲咨行該官紳議辦臣並詳告以黔省民教情形必須逐漸勸導不可操之太急該酋等尙能領會並未過相促迫臣惟隨時咨催貴州撫臣督同地方印委各員趕籌辦結除將臣照會法使一件並法使照覆一件鈔咨軍機處總理衙門備查外所有羅淑亞駛至漢口與臣商辦定議該使已起程回京各緣由謹繕摺由驛具奏伏乞

皇太后

皇上聖鑒謹

奏

遵

旨援黔籌陳大略摺

同治九年正月十三日

奏爲恭謝

天恩籌陳大略情形仰祈

聖鑒事竊臣於同治九年正月初七日承准軍機大臣字寄八年

十二月初七日奉

上諭貴州軍務日久未有起色著卽馳赴貴州所有川楚貴州各軍均歸節制儻各軍不能得力卽行裁撤咨明崇實吳棠劉崐將此項兵精仍解赴李鴻章軍營充餉該督上年凱撤之師其中不乏驍勇著卽酌量奏調赴黔廣西防邊之兵如須調赴黔省會剿並著酌度辦理李瀚章署理湖廣總督著將應解餉需源源轉運此外協黔各省著李鴻章曾璧光隨時咨催接濟等因欽此並奉是日明發

諭旨一道臣當卽恭設香案望

闕叩頭謝

恩伏念臣以駑鈍之資屢膺軍旅重任茲因黔苗負固仰蒙
授鉞專征敢不殫竭愚誠力圖報稱惟苗疆構亂幾二十年將帥
疊更迄未底定固由兵威不盛實由餉項太虧近年川楚派兵進
援聲勢稍壯甫克數城而事機中沮臣自上年蒞楚入蜀竊嘗深
求其故湖南席寶田等軍先後添募三萬人分紮數路月需餉銀
十七八萬兩聞每月僅能籌發二十日口糧四川唐炯等軍先後
增募一萬八千餘人歲需餉銀百餘萬聞已欠至五十餘萬將士
藉口餉缺不克進取若遽加裁併又無力補發欠款至黔省主軍
自張文德都勻飢潰後劉士奇接署提督亦苦募練無資各省派
協月餉非不肯籌應只以兵燹之後財力維艱京甘各緊餉急於

星火不得不儘先湊撥即不得不置西南邊患爲後圖茲奉

飭由臣等咨催臣何能強其力所不逮者而使之遵辦是川楚有

蓄之餉尙不足以自贍其派撥之軍黔餉雖名本部撥而實爲無

蓄臣身歷行間十載稔知無餉則兵不可用今黔餉奇絀臣奉

命前去並未奉增的實餉款必仍不免師老無功之譏此餉事之

爲難也黔地跬步皆山苗巢險悍尤在貴東一帶與湖南邊境毗

連周迴數千里荒巖密箐猿壁獠崖非人迹所能到外開勁旅扳

援上一峻坡已喘息不能行動雖數路進勦往往巖谷所阻十里

五里聲息難通又溪峒毒瘴疫癘時作最不宜於客兵與平地用

兵迥異上年三月楚軍黃飄之敗距川軍紮營處僅隔數十里援

救無及此其明證苗人自佔巢穴本無遠志但欲勦除斷難剋期

易曰高宗伐鬼方三年克之東漢時劉尙馬援皆中興名將乃以

征苗敗沒我

朝雍正年間鄂爾奈合數省之力經略九年甫定而復叛嘉慶初年福康安移師討苗亦合數省之力深入不利後十餘年而始定成事具在班班可考今頑苗梗命愈久蹂躪愈廣收拾愈難非有勁軍鉅餉期之歲月何能立見功效臣去春接曾璧光來函謂上下游可指日肅清而崇實吳棠劉崐等奏報每有微倖目前一鼓盪平之語似於事勢尙多隔膜臣自揣才力遠遜前賢時會艱難更百倍之向來督勦粵捻所部將領習於平地戰陣於山險煙瘴之區誠恐遷地弗良用他人已成之軍又慮心志不一此地勢軍情之爲難也自來川兵必先請運道曾國藩與臣先後勦捻皆於金陵設總糧臺清江徐州濟甯周口分設轉運局臣上年赴直援勦又於張秋德州天津增設轉運數千里糧餉軍火轉輸不絕前

敵乃無掣肘今忽易北而南沿途必須籌辦而轉運非水道不行
查由江鄂上至黔境後路須由長江前路須由灘河節節逆流挽
運遲滯川河灘高水險由鄂至重慶舟行須三月餘且多失事不
若由鄂至湖南常德辰州較使從前平三藩定苗疆皆以常德爲
兵餉總匯而進兵駐節之地亦多在辰沅一帶其勢然也第後路
過遠需費甚鉅至苗地民散田荒無糧可購川楚各軍皆於數百
里外購運米糧崎嶇負戴常苦不繼他處車運牛運之法均不能
用惟專用夫運每天負米四斗險路日行僅二十里其何能濟其
糜費阻絕之處諸可類推人一日不再食則飢兵士豈有不食而
戰之理苗民諺曰不怕官府兵多只怕官府糧多蓋險遠購運費
錢費力苗亦知其不得多耳此采辦轉運之爲難也以上三難皆
係實在情形臣既奉

命督師雖事值萬難奚敢稍有諉卸但若冒然前往明知無濟而又不預爲籌畫尤於微臣平日治軍故事之素志大相刺謬現已緘商兩江督臣馬新貽江蘇撫臣丁日昌能否仿照上年勦捻舊章增撥餉項籌濟軍火俾無缺乏至臣舊部智勇之將如劉銘傳郭松林潘鼎新周盛波等皆可當一面或稱傷病未愈或慮人地未宜臣並兩屬其來鄂面商再行酌量奏調未便強從湖北入款僅敷每年全解京餉及月解甘餉四萬並留防各水陸之用恐無餘力多贍黔軍仍俟署臣李瀚章到任與郭柏蔭妥籌轉運解濟之法並將臣歷年東北用兵經手各事未盡清釐之處商請督臣就近咨商各料撫安辦總之黔省兵事尙非急在旦夕臣向來任事未敢遲誤此次遠征苗疆距京幾及萬里一切進止調度自須臨事妥酌機宜以期有濟仰懇

聖明勿責速效並隨時諭令各督撫臣通力合作俾可逐漸圖功臣當恪守孔聖懼事好謀之訓常存漢臣鞠躬盡瘁之思冀仰答高厚隆施於萬一除俟李瀚章到鄂交替並後路籌有規模卽行起程山湘赴黔外所有恭謝

天恩並籌陳大略情形謹據實繕摺由驛五百里覆奏伏乞

皇太后

皇上聖鑒訓示謹

奏

援黔籌撥餉需片

同治九年正月十三日

再臣督師遠出需餉浩繁目前毫無指款除已緘商江蘇督撫臣查照上年勦捻章程酌量增撥俟覆到再行具奏外查江海關稅課尙旺向定月撥臣營五萬兩自七年冬開淮軍凱撤留防各省每月減爲二萬茲復有征黔之舉應請

旨敕下馬新貽丁日昌於江海關額餉二萬外按月加撥該關四成洋稅二萬兩六成洋稅一萬兩仍合原撥五萬之數至湖北江漢關係臣管轄除遵撥京餉及月協陝西四成洋稅一萬外稍有盈餘請

旨准飭該關按月撥解臣營四成洋稅二萬兩六成洋稅三萬兩衰月不足以旺月補之又前勦捻時山東月協潘鼎新營餉三萬兩嗣減爲每月一萬五千兩鼎軍撤後業經停解該省肅清已來

入款漸增撫臣丁寶楨來書每以黔苗不靖爲患情殷桑梓諒必竭力籌助擬請

旨敕下該撫酌照前協臣軍月撥三萬減爲月撥二萬兩自本年二月分起如數籌撥按月委員解交金陵軍需局轉解臣後路糧臺源源接濟勿稍缺乏遲誤俾利師行理合附片陳請伏乞聖鑒訓示謹奏

請裁蜀軍騰餉援黔片

同治九年正月十三日

再臣入蜀半載查核該省出入款口每歲約收銀四百四十餘萬額放解銀至六百餘萬不敷尙多是以援黔之唐炯等軍月餉十餘萬每苦不繼該軍進紮重安黃平等處與賊相持留餉吳棠竭力籌撥至月協雲南三萬貴州五萬久已不能照解就大局而論川境與滇黔唇齒相依蜀中財賦完善必須就近兼顧惟本省各營勇餉歲需三百三十餘萬之多內惟唐炯等進剿前敵非同虛糜其餘如提督唐友耕所部六千餘人業由滇省撤回提督周達武所部八千餘人先剿甯越夷匪現亦抽調腹地均應及時裁減騰出餉需以厚贍出征兵勇兼可分濟鄰疆吳棠等亦欲趕緊籌辦但以周達武積欠三十餘萬唐友耕積欠十餘萬難遽籌補或致因循不決擬請

旨飭備崇實吳棠將前項大枝不出勦之軍及該省不得力零營
迅速籌款酌減補欠逐漸裁汰仍將裁廢之餉儘力分濟援黔各
軍及酌撥滇黔協款並隨時知照臣處備查冀於全局有裨伏乞
聖鑒訓示謹附片具

奏

湖北汛兵裁留改撥摺

同治九年二月初二日

奏爲查明湖北陸營水汛員弁兵丁分別裁留改撥恭摺
奏祈

聖鑒事竊照新設長江水師在湖北境內上接岳州下達九江又
沂江而上至荊州府止凡隸外江內河者除曾國藩等原奏擬裁
漢陽荊州兩水師營員弁兵丁繼復議准分別酌留改駐撥還外
其餘濱江各營如武昌城守營興國營黃州協營蘄州營道士洑
營荊門營荊州城守營各設有專轄兼轄水汛弁兵應否分別裁
留原奏內未經議及現在長江水師分汛已定應卽逐一酌核妥
定去留以補原議之未備臣督飭司道會商各標鎮協營就近體
察地方情形公同酌議除將前議荊州水師營酌留兵丁九十二
名擬以五十二名分撥萬城大隄專爲防險之用又以四十名撥

歸該營原帶礮船四隻令沿隄巡察並巡緝江陵監利一帶內
河毋庸另設弁兵以符原奏外其興國營所轄分防富池口黃陂
二汛均在長江水師汛段之內應歸長江水師巡防惟該汛所管
陸路旣寬且內湖港汊紛歧巡防均關緊要未便議裁又蘄州營
所轄多係內河地段荊州營所轄濱臨襄河不在長江水師汛段
之內應令照舊巡防又荊州城守營所轄江陵南路至監利螺山
二汛江面均在長江水師汛段之內應改歸長江水師專轄惟該
汛分防陸路地段多於水路毋庸議裁此外武昌城守黃州道士
汛各協營所轄水汛員弁兵丁應分別裁留改撥俾資分布而專
責成據司道等會議分條開摺具詳前來臣覆加察核均屬妥協
理合繕具清單恭呈

御覽所有續議湖北武昌城守等營水汛員弁兵丁分別裁留改

撥緣由謹會同湖北巡撫臣郭柏蔭恭摺具陳伏乞
皇太后
皇上聖鑒敕部查照謹
奏

謹將續議湖北武昌城守黃州道士汛等協營水汛員弁兵丁分別裁留改撥各數目繕具清單恭呈

御覽

計開

一武昌城守營分防金口汛外委一員兵丁四十五名蘄洲汛外委一員兵丁三十名該二汛濱臨大江現歸長江水師巡防應請裁除惟查該營專城左哨千總原設省垣有經管九門倉庫監獄藥局堆卡巡查城內外街道護解餉犯等事並有協防外汛之責差務浩繁兵丁不敷撥遣擬請將所裁之金口蘄洲兩汛外委二員改移省城分駐山前山後以爲該千總協防其所撤二汛兵丁七十五名擬酌留四十名併歸該千總差派計裁兵丁三十五名一黃州協營陽邏汛把總一員又貼防巴河口塘外委一員又貼

防李家渡塘額外一員兵一百二十三名原設上自漢陽黃陂兩縣交界之晉家墩塘起下至蘄水縣屬之迴風磯止水程二百五十里現歸長江水師巡防惟該營陸路尙有緊要之處擬請將陽邏把總改移黃安縣城駐紮至該營原設黃安縣外委一員卽移黃陂站帶兵十名駐紮又巴河口塘外委一員擬請改移麻城縣屬兩路口帶兵二十名駐紮計裁李家渡額外一員兵丁九十三名

一道士汛營守備一員把總一員外委一員額外一員兵二百五十五名該營原管水汛上自武昌縣屬之觀音港塘交界之士腦嘴起下至黃梅縣屬與江西九南協塘交界之戴伍屯塘止共計水汛三百二十七里七分現歸長江水師巡防該營官兵應請全裁惟查該營尙有經管陸路汛地擬酌留外委一員帶兵二十名巡防

併改隸附近之興國營作爲大冶縣汛把總協防計裁守備一員把總一員額外一員兵丁一百八十五名

以上共計裁守備一員把總一員額外外委二員兵丁三百一十三名所裁員弁各缺擬請仍照長江水師案內奏定章程遇有通省陸營相當缺出卽行補還至旣裁以後未補以前仍留原營差遣照例支給本缺俸薪以示體恤兵丁卽飭歸農

奉旨援陝酌籌派撥摺

同治九年二月三十日

奏為欽奉

諭旨赴陝西督辦援剿酌籌派撥情形恭摺仰祈

聖鑒事竊臣承准軍機大臣字寄同治九年二月十六日奉

上諭西路猖逆分竄秦境蔓延榆綏延各屬該處土匪潰勇本未
芟除淨盡深恐勾結為患李鴻章本令督兵入黔郭松林等軍尙
屬不少即著就現有之兵先行統帶入陝剋日迅速前進將竄陝
各猖逆悉數肅除並著扼要駐紮與定安李宗義劉典所派各軍
聯絡聲勢加意防範其北山土匪潰勇並著派得力之師次第搜
捕淨絕根株等因欽此並奉是日明降

諭旨一道跪聆之下仰見

聖謨廣遠籌備精詳曷勝欽悚臣前因督師圖黔酌調舊部勁旅

正在面商直隸督臣曾國藩分撥劉銘傳所部銘軍兩江督臣馬
新貽飭撥吳長慶親兵各營尙未定議至留防鄂省之湖北提督
郭松林僅裁贍步隊五營不足以當一路廣西右江鎮總兵周盛
傳貴州安義鎮總兵唐仁廉所統慣戰馬隊於黔中山險不宜正
月閒業飭遣撤騎卒改練步軍茲奉

旨率師援陝局勢又變查西北地形平曠非馬步兼用不能得力
獨騎飄忽肆竄尤非馬隊無以制勝臣與郭松林等再四籌商身
邊無一騎一駝何以應敵致遠亟飭該提督派員分赴皖豫一帶
趕募馬隊五營步隊十營周盛傳起募馬隊四營剋期齊集認真
訓練並添購車馬豫辦糧草以利師行由鄂入陝餉項軍火節節
轉運均由陸路事體亦甚繁重現於湖北省城設立後路糧臺分
遣委員沿途察勘設局接運應俟諸務籌布就緒郭松林周盛傳

等募練成軍卽督催分起前進昨准河南撫臣李鶴年緘咨據西安軍需局探稟陝匪有微鄂之說湘營潰勇陸續東來請豫籌堵扼等因臣已飛飭現駐襄樊之記名提督譚仁芳速撥兩營往紫河南浙川之荆紫關要隘以扼商南竄路仍分隊聯紫河口樊城以固邊防署督臣李瀚章日內抵鄂擬卽交卸篆務將前敵兵餉後路轉運一切妥與籌議再行剋日起程相機籌辦以期仰副聖主委任之重所有遵

旨赴陝援剿酌籌派撥情形謹繕摺由驛五百里覆陳伏乞

皇太后

皇上聖鑒訓示謹

奏

籌辦援陝軍糧片

同治九年二月三十日

再行軍以籌糧爲先秦中久遭蹂躪軍分途辦運糧價極昂臣
軍遠去人地生疏倉猝無從采購飢乏堪虞查晉省潁河各處防
軍無多購糧較易撫臣李宗義暨藩司何璟與臣共事多年素願
大局合無仰懇

聖恩飭下李宗義督同藩司迅速籌墊款項並派委員馳赴吉州
蒲州一帶沿河地方分投采辦米麥各二萬石擇地寄儲以便臣
軍由潼關入北山就近運取儻一時辦不及數應准借撥沿河州
縣存倉穀石務期儲備足額咨報臣處隨時指用勿誤要需伏乞
聖鑒訓示施行謹附片具

奏

籌購駝隻片

同治九年二月三十日

再運解軍糧子焚駝隻最宜臣往年督師勦捻每派員出口購辦凱撤已久散失無存茲倉卒西征若待委員往辦必致貽誤查綏遠城東北一帶素產橐駝可否懇

恩飭下綏遠城將軍定安酌派妥員就近代爲采購膘壯駝隻二千匹照料進口該價銀若干知照臣處籌付臣入關後卽派員前往迎提以濟急需伏乞

聖鑒訓示謹附片具

奏

起程赴陝日期摺

同治九年三月二十一日

奏為恭報起程赴陝日期仰祈

聖鑒事竊臣奉

命赴陝援剿業將酌籌派撥情形具奏奉

旨著俟李瀚章抵鄂及郭松林等募練就緒卽行督軍入陝等因

欽此查李瀚章於三月初二日抵省臣卽於是日交卸湖廣督篆

所有行營徵調兵將籌撥糧餉一切奏咨檄行事件現已刊用木

質關防其文曰督辦陝西軍務協辦大學士湖廣總督行營之關

防後路籌餉轉運各事連日會商李瀚章等粗有端緒惟郭松林

周盛傳分赴皖豫起募馬隊尙未據報成軍添購馱騾亦猝難應

手臣飭郭松林周盛傳各統現有步隊先由鄂省拔赴樊城周家

口等處整頓行裝仍俟馬隊募齊就近歸併操練再行分起入關

相機堵剿臣俟諸務料簡稍定擬於三月二十四日起程督帶糧械軍需船隻由水路赴襄陽再覓雇車騾登陸前進沿途籌布轉運俾資接濟所有刊用關防並起程赴陝日期恭摺由驛具陳伏乞

皇太后

皇上聖鑒謹

奏

潘鼎新丁憂片

同治九年三月二十二日

再據頭品頂戴前山東布政使潘鼎新呈稱同治七年十月赴京
陛見奉

旨發往陝西交左宗棠差遣當經奏奉

上諭賞假回籍省親嗣因母病未痊弗能遠離稟由

臣奏請

開缺奉

旨准其開缺再行賞假兩箇月俟假滿後即赴左宗棠軍營差遣
等因欽此正擬料理赴營事宜母病增劇醫治罔效延至三月初
二日病故鼎新係屬親子在籍見喪例應遵制成服除由本籍地
方官呈報丁憂外請奏懇

恩准在籍終制營葬稍贖從前馳驅戎馬久違孝養之罪愆等情
前來臣查潘鼎新自咸豐年間由舉人從軍歷隨臣帶勇克復蘇

浙各城勦平東西兩股巨擒戰功最著該藩司謀勇沈毅堅忍耐
苦實爲近日文員中傑出之才卽如四年夏間統師由滬航海赴

津先聲頗震七年春間帶隊先往保定堵賊北竄功在
畿輔遠近皆知該藩司久勞於軍補官數年未一蒞任疊蒙

聖恩續假寬期侍奉母疾正月間奉

命督師貴州曾奏明而招該員來鄂面商軍事乃以母病遷延未
果茲復呈報丁憂籲請終制情詞甚爲懇切可否請

旨准其在籍守制以遂孝思並現改赴陝西於彼開軍情布置尙
未得有端倪如將來前敵需人容再隨時察酌奏調理合據情附

片具陳伏乞

聖鑒訓示謹

奏

江蘇釐金充餉請加中額摺

同治九年三月二十一日

奏爲勘捻軍需全賴江蘇釐金充餉援案請加該省鄉試中額恭摺仰祈

聖鑒事竊臣於同治元年三月統師赴滬蒙

恩擢授蘇撫其時蘇省徧地皆賊官軍分路進攻就地籌餉不得不整頓釐金以資騰飽迨三年六月金陵克復全境肅清蘇軍分赴各省援剿四年四月曾國藩奉

命督師剿捻檄調蘇軍仍藉蘇釐充餉臣於六年正月接辦剿匪

事宜是年十二月剿平東捻任桂賴汶沆等股七年六月剿平西捻張總愚等股皆由蘇省釐餉源源接濟臣等得以迅速成功查軍興以來各省創辦釐金幾與丁漕關稅同爲歲入正款商民亦習而安之然不過籌濟本省軍餉或分協各路軍營未有如蘇省

釐捐專濟勦辦粵匪捻匪之多且久者溯自同治元年四月至四年五月底止業經列款分案報銷爲數甚鉅無論已卽自四年閏五月起至七年六月底止撥解勦捻軍需案內蘇省釐捐銀約計七百五十餘萬兩捐章雖較煩重該省商民踴躍輸將協助出境征軍不遺餘力中原積年狂寇藉以一鼓蕩平實有裨於大局非淺捻逆平後曾國藩丁日昌疊經裁減釐章稍紓民困近雖收數大減猶分供各省防軍及軍援陝之需查釐捐本無給獎之例惟集成鉅款俾賊勦捻大功非酌請獎勵無以爲好義急公者勸同治三年八月間曾國藩以江甯克復借用廣東釐金一百二十萬奏蒙

特旨准加廣東文武鄉試永遠中額各四名茲江蘇釐金解濟直東豫歷年勦捻軍需七百五十餘萬之多事同一律數加五倍

愚擬懇

天恩俯准加廣蘇省文武鄉試永遠中額各八名卽自本年庚午科爲始以廣

皇仁而彰義舉蘇省人文極盛中額本少捐數過多嗣後他省應勿援以爲例仍請

旨敕下兩江督臣江蘇撫臣督飭司道隨時設法整頓釐務照舊竭力籌解勿誤要需所有江蘇釐金濟餉巨款援案請加中額緣由謹會同大學士直隸督臣曾國藩兩江督臣馬新貽江蘇撫臣丁日昌專摺具陳是否有當伏乞

皇太后

皇上聖鑒訓示施行謹

奏

西捻肅清彙保摺

同治九年三月二十二日

奏爲七年勦辦張總愚捻逆全股蕩平中原一律肅清續行查明
劉銘傳郭松林楊鼎勳潘鼎新周盛波周盛傳吳長慶所部與親
兵馬步各營歷在豫東直三省轉戰出力文武員弁及調防黃河
運河之黃翼升長江師船暨各路水師併後路歷年籌餉製造采
辦轉運各官紳遵

旨分別勞績彙案請獎仰祈

聖鑒事竊上年六月業將勦平西捻之善慶溫德勒克西馬隊及
零星遣撤各營先行奏獎並聲明留防各軍及水師後路臺局人
員容臣細查彙奏續獎在案溯自七年正月張總愚捻股由晉豫
突竄畿疆臣遵檄郭松林楊鼎勳潘鼎新周盛波周盛傳吳長慶
等軍陸續北渡饒陽戰而賊酋張志清乞降武強勝而偽王邱得

才挫氣始則偏賊南走繼復扼賊河防轉戰半年馳逐千里五月間周盛波郭松林潘鼎新等疊次大捷該逆已窮蹙無措六月初劉銘傳回營會督追剿益以黃翼升等水師聯絡聲勢在平之役一鼓聚殲張總愚淹蹙中原一律肅清此皆仰賴

聖主威福將士用命非臣與各疆臣意料所及當經遵奉

恩諭分案彙保行知水陸各統將暨後路臺局查明勞績開單請奏前來臣逐加核減茲將武毅勳鼎盛傳慶諸軍及親兵礮隊馬步各營彙繕清單一件至劉銘傳奉

旨總統前敵各軍該部素稱得力六年冬勦平任柱賴汶洸東股論功最多適因勝仗彙保甫經專奏故東捻肅清案內該營員弁未加甄錄此次併敘前績另繕銘軍清單一件迎河圍賊若無礮船相助斷難成功臣咨商曾國藩飭調長江提督黃翼升統帶水

師北來與楚軍丁長春淮軍徐道奎各師船節節布置時出行隊
邀截六月中旬張逆由德州撲河中流礮回爲功尤鉅月繕水師
清單一件又淮軍全食蘇餉軍裝洋械皆恃甯蘇滬三處造辦轉
運紆遠水陸煩勞後路籌濟一切迅速無誤月繕各臺局所出力
官紳清單一件以上分別核獎自局外觀之或嫌人數過多惟軍
營用眾之地大功告成之時羣策羣力一材一藝臣何敢稍有遺
漏臣上年秋初入蜀查辦事件奔馳道路臘杪始回又疊奉征黔
援陝之

命諸務倥傯致此案久未繕辦愧無以對將士負疚滋深現在有
事遑陞需才更亟若非從優給獎奚以示大信而勸將來應懇
聖恩俯如所請以資鼓勵至各員弁所保官階臣均查照部定章
程從嚴核擬並無冒濫可否

飭部照准一併註冊免再議駁覆奏出自格外

仁施除千總以下各弁及六品藍翎等項循案造冊咨部外所有續行查明剿平西捻水陸各軍並後路籌餉製造采辦轉運出力人員彙案分單請獎緣由恭摺由驛具

奏伏乞

皇太后

皇上聖鑒訓示再上年六月奏保西捻肅清首案武職人員業奉恩准兵部行令分別勞績再行奏明辦理臣查向來保獎武職多係衝鋒陷陣並不分敘勞績可否請

行敕部照章准其一併註冊合併陳明謹

奏

馮桂芬請加三品卿銜片

同治九年三月二十二日

再四品卿銜前詹事府右中允馮桂芬平居講學著書歸然爲東南耆宿臣前督師至滬該紳創立會防局調和中外襄籌防勦動中機宜臣與商擬江蘇減賦章程期於實惠及民謀設上海廣方言館務求博通西學卓識閎議足裨軍國而垂久遠屢蒙詔旨垂詢以年老多病不克赴京爲憾臣馳勦東西捻股該紳雖未隨至前敵而函牘往返諮度軍事多所匡救茲值中原肅清東南大定之際追念前勞允翕眾望可否仰懇

聖恩破格優獎

賞加三品卿銜以爲留心時事者勸謹附片陳請伏乞

聖鑒訓示謹

奏

覆議獎案部章片

同治九年三月二十二日

再千把總以下所請獎敘向係循案造冊咨部註冊臣於七年彙辦東捻肅清併上年遵辦西捻肅清兩案內咨獎各弁先後接准部咨除與定章相符已查照註冊及單內所請翎枝歸標等項亦均照准外其由外委逕保千總軍功逕保把總者皆係越級應各照章遞減給獎並查所得軍功是否奏明有案行令覆查飭造履歷報部等因當即轉行遵辦去後茲據各統領呈稱前敵艱險惟兵勇爲尤苦忍飢冒暑日馳百數十里殺賊出力疊次由營存記併於一案彙獎非給與優敘不足鼓勵戎行臣查軍興以來武職得保過多千總以下各弁真能拔補實缺者百無一二卽保升後仍在營充當勇丁每日所得口糧在本地糧價騰貴之時尙不足以供一飽自接仗獲勝至於屢戰滅賊不過邀保獎之虛名稍一

挫敗卽已阻性命於俄頃其情實有可憫茲部定新章不准越級保升原爲慎防冒濫起見惟予獎之差等均核其戰績之淺深臣愚竊謂守備以上品秩較大不可不示以限制千總以下職名稍微似不妨畧予寬容可否仰懇

聖慈飭部仍各照前兩案各獎一併註冊以勵軍心至該弁等所得軍功等項平日各統領先在臣處請給六七八九品空白功牌遇有陣前立功者由各營隨時分別酌填給獎爲日既久各統領冊報參差不齊各弁勇轉戰撤散不常且值軍書愴惚均未及奏明有案應併懇

恩施免其補奏以省案牘理合附片陳明伏乞

聖鑒訓示謹

奏

遵派勁旅先行赴陝摺

同治九年四月二十二日

奏爲遵

旨酌派勁旅先行分道赴陝臣卽督隊由襄陽前進恭摺仰祈
聖鑒事竊臣於三月二十四日由鄂省起程業經奏報在案途次
疊奉三月十五二十五三十等日

諭旨飭派勁旅先行赴陝會合各軍安籌堵剿當因廣西右江鎮
總兵周盛傳貴州安義鎮總兵唐仁廉帶隊先往河南周家口添
募馬隊飭卽趕備行裝剋日起程現據周盛傳呈報四月十六日
統率盛仁各軍步隊十六營及新募已到馬隊三營由周口拔隊
進赴潼關臣行抵襄陽察勘運道須由荆紫關武關至商州龍駒
寨入陝爲便派員沿途設局接運糧餉軍火並飭調鄂軍記名提
督譚仁芳分撥所部兩營扼紮荆紫關武關要隘以固秦楚邊防

兼護後路餉運其餘步隊五營馬隊兩哨卽飭由武關商州藍田
開道逕赴西安以壯聲援湖北提督郭松林所部步隊十五營已
抵樊城惟招募馬隊未辦驟匹尙未見到應俟各事就緒卽由該
提督率隊繼進臣連日雇覓車騾擬帶親兵馬步先由南陽陝州
大路馳赴潼關駐候隊伍到齊再行察酌調度擇要進紮認真防
剿臣派員赴陝查探軍情及該省地方官稟報本年春閒陝獮兩
次內竄雖經退去惟未受大創必思再逞狡謀秦隴交界寫遠北
之金積堡南之河州狄道皆係陝甘各獮積年巨巢甘境各州縣
亦多零股踞擾游騎四出與秦邊處處可通實屬防不勝防至北
山延榆綏一帶地本瘠苦獮匪潰勇蹂躪日久田荒人少戶絕炊
煙官軍深入必須裹帶糧草轉運費力屯墾兼營尤當逐漸籌辦
容俟入關後悉心體察與蔣志章等相機妥籌次第具奏所有酌

派勁旅分道赴陝臣卽督隊前進緣山謹繕摺由驛馳陳伏乞

皇太后

皇上聖鑒訓示謹

奏

采糧購駝情形片

同治九年四月二十二日

再陝甘用兵以糧運爲第一要件糧運未經籌妥則兵勇乏食一切調度布置皆無實濟臣於二月間奉

旨援陝先行奏請晉省采辦米麥各二萬石寄儲備撥緩遠城將軍代購駝隻二千匹原係豫爲之備嗣准山西撫臣李宗義面稱晉省糧價極昂擬派近河各州縣分投采辦祇能以米麥二萬石爲率約計需價銀十萬兩惟司庫爲京協防餉所累無款可墊不得已借動地丁正項商請奏明酌抵京餉等語臣深知部庫艱難何敢遽請抵撥惟此次倉猝西行各省添協之餉本屬無多招軍買馬整備行裝沿途采辦轉運實已竭蹶萬狀若再令臣添撥晉省糧銀十萬兩力何能堪若不准抵又恐該省因此諉延致誤急需此項糧價可否仰懇

聖恩飭部准抵山西京餉五萬兩其餘五萬兩暫由該省籌措俟臣營協餉解到稍可周轉卽行解還歸款至級遠城駝隻欽奉三月二十一日

寄諭令察哈爾都統文盛於西林果勒捐駝內調撥如不足數由定安設法購買補足或於四愛曼等處量爲添撥飭臣斟酌由內地設法運解等因臣查內地向無駝隻只有騾匹可資載運中原被兵多年騾產旣稀各軍購辦愈形艱貴臣已派員采買雇用難遽湊齊且騾非麩料不食陝境荒瘠多虞飢斃臺駝喂養較易又可任重耐勞自古西北行軍胥賴此物未知文盛等能否照撥臣已分函醇親王令此次出口買馬員弁稟商定安設法代辦俾不致停軍待運擬懇

飭催文盛定安務於秋後如數撥給應壯駝隻勿稍遲誤臣爲禱

備軍需起見附片瀝陳伏乞
聖鑒訓示謹

奏

援黔協餉改協援陝片

同治九年四月二十二日

再臣前擬督師入黔奏奉

旨准飭江漢兩關添撥洋稅銀兩又浙江山東月協二萬兩均經各督撫臣陸續籌撥惟山東撫臣咨詢援黔之餉是否改協援陝之用已咨覆請其趕緊籌解臣征黔之役尙賴該省有川湘援黔兩軍巨餉可資調發且黔境糧價較秦稍平運道亦稍近便茲由鄂邊赴陝陸路已千數百里由陝運赴前敵遠近更難豫計關隴被擾最深農田久荒各軍雲集需糧尤夥近來糧價奇昂車騾運腳繁費極重所以左宗棠咸得的餉七百餘萬猶時形匱乏也臣現勻抽各省留防之軍陸續赴陝因地廣兵單道遠運艱添募馬步儲備糧藥廣購騾駝動需巨款現撥餉項實不敷用查前議川省裁軍騰餉經崇實吳棠竭力籌辦業臻妥洽秦蜀唇齒相

依誼應協助可否請

旨敕下四川將軍督臣飭司自本年五月分起按月籌撥臣營餉銀三萬兩就近解陝源源接濟稍助購糧轉運之需該將軍等素顧大局當不致有膜視理合附片陳請伏乞

聖鑒訓示施行謹

奏

行抵潼關籌糧議勦摺

同治九年五月二十四日

奏為臣行抵潼關酌派各軍分路進紮妥籌糧運相機堵剿恭摺仰祈

聖鑒事竊臣督隊由襄陽前進業於四月二十二日馳報在案當經飭催周盛傳統率盛仁各營先行入關因同州韓城為進兵北山之路令卽帶隊馳往移紮察度機宜周盛傳唐仁廉等於五月初十日抵關十二日進紮同州臣亦於十六日馳抵潼關暫駐各營新募馬隊分起遠來疊經派弁沿途提催尙未齊集又飛飭郭松林一軍由襄陽荆紫關武關藍田間道逕赴西安日來計已抵省臣令其稍為整息卽渡渭河由三原邠乾一帶進紮遮蔽腹地查進兵本有次第秦中蹂躪最深糧米艱貴轉運費力北山縱橫千數百里久為猖匪潰勇出沒之區尤屬荒瘠異常芻糧無從采

辦勢須自山外設法進入乃可派隊進剿若未籌糧運卽要進兵
斷斷無此辦法臣現委道員郭道直赴晉省沿河一帶提取各州
縣辦存軍糧購雇駝騾就近河之宜川延川延長各口岸分路轉
運會商各營撥隊護送必將北山要地運存糧食節節轉般然後
節節勦洗方有把握惟未能剋期集事焦灼曷任郭松林進紮西
北一路亦須籌糧籌運逐漸布置以期穩固軍心查秦隴交界二
千餘里頭頭是道本無總會要隘可守狗騎獐路徑又熟此防
彼竄防亦無益臣前辦捻逆疊奉

諭飭各省嚴防究有何省能防賊不竄入者蓋城池及山水阨塞
處可守而平原曠野無可守也秦中西北多平曠而少阨塞考之
歷代用兵有剿法無防法臣此次西來僅調郭松林周盛傳兩大
枝之軍以備游擊茲擬令周盛傳進規北山郭松林專顧腹地隨

時會合陝楚各營相機堵剿不敢冀倖賊不同盜但我有以備之
或得蓄勢痛擊藉可仰紓

宸廑除俟此閒籌布就緒再進駐西安與蔣志章會商一切分別
緩急次第辦理外所有行抵潼關派軍分路進紮妥籌糧運相機
堵剿各緣由謹繕摺由驛五百里具陳伏乞

皇太后

皇上聖鑒訓示謹

奏

調郭寶昌赴陝片

同治九年五月二十四日

再途次接准安徽撫臣英翰函商以記名提督壽春鎮總兵郭寶昌現因卓勝全軍調往金積堡由陝甘督臣左宗棠派令金運昌統帶進剿郭寶昌留辦山西河防僅帶一營不能成軍營因傷病乞假請臣人關後就近察酌調度等因臣昨抵潼關郭寶昌來見據稱前敵卓勝營糧餉均已割歸金運昌接管意欲請假回籍該鎮久經大敵驍勇著名現值用人之際應令及時自效查目下黃河漲發猥氛較遠晉防已緩該鎮僅帶一營無關輕重惟其轉戰陝省數年於北山情形尤熟與淮軍氣誼相洽擬檄令暫帶該營西渡會商周盛傳等兜剿北山土匪潰勇剿撫兼施冀收肅清之效並咨請山西撫臣酌飭防河各營勻紮該營地段必無貽誤理合附片陳明伏乞

聖鑒訓示謹
奏

避旨帶軍赴直摺

同治九年七月初五日

奏爲欽奉

密諭酌帶各軍刻日起程馳赴近畿一帶相機駐紮恭摺覆陳仰

祈

聖鑒事竊臣前抵潼關派兵分路進紮業經奏奉

上諭著進駐西安隨時相機宜會商蔣志章次第妥辦等因欽此當將周盛傳進軍北山糧運各事料理粗定卽於六月十二日自潼關啟行赴省沿途阻雨二十七日始抵西安正與蔣志章籌布防務七月初四日承准軍機大臣密寄六月二十八日奉

上諭天津滋事一案曾國藩奏請將辦理不善之天津府縣交部治罪而法使羅淑亞必欲將該府縣立即正法並諭曾國藩崇厚據理駁斥斷不能如此辦法本日據崇厚奏稱法國水師提督都

伯理現已到津崇厚前往會晤所言與羅使無異並據繙譯官德微理亞聲稱如至二十七日尙無切實回信卽將在京法人帶赴上海曾國藩病瘵復發卧牀不起勢甚危篤等語已派毛昶熙前往天津會同曾國藩辦理並令丁日昌由海道赴津幫同商辦惟該國既有兵船到津亟應豫籌備禦曾國藩病勢甚重一時實乏知兵大員可資戰守刻下陝省軍情稍鬆著李鴻章移緩就急酌帶郭松林等軍剋日起程馳赴近畿一帶駐紮屆時察看情形俟旨調派現在事勢緊急該督務須迅速前進毋稍遲誤其陝省防剿事宜卽著知照左宗棠蔣志章妥籌辦理將此由六百里加緊密諭知之等因欽此臣伏讀之下震悚焦急莫可名言前准總理衙門暨曾國藩函知津事原委臣竊料夷情叵測卽商請曾國藩酌帶親軍勁旅移紮附近衝要若該酋無理取鬧尙可稍有搪抵

並密飭現駐直東之臬司劉盛藻丁壽昌各帶銘軍相機準備昨接曾國藩六月二十三日面稱法使羅淑亞照會欲將天津府縣抵命該府縣並無大過不得已奏交刑部治罪已覺內愧方寸外干清議等語臣正增憂系茲蒙

聖明指示斷不能如此辦法仰見

權衡至當該酋等平日脅

朝廷以制官脅官以制百姓其心固甚畏百姓也今未根究下手兇犯先欲官爲抵償不但無以服天津士民之心亦無以服天下臣庶之心夫是非者立國之本此案詎在津民業經事事認錯情理備至而羅淑亞等恃強逞忿不論是非之公並欲使我

國家紊亂其是非卽令隱忍遷就後將何以立國想毛昶熙丁日昌到津後必與曾國藩等妥商趕緊訪拏兇犯議抵惟該國既有

兵船到津聞復往安南等處陸續徵調

京畿根本重地豈可束手受制於人誠如

聖諭亟應豫籌備禦臣昔在蘇滬與洋人久相交涉所部將士與洋兵曾共戰陣習知其平素伎倆恃火器水路船礮我軍或難與爭長陸路野戰彼族亦難操必勝蓋大礮笨重不宜運行又洋人不能自築營壘一敗則無歸宿也疊准左宗棠咨函甘省軍務漸有起色陝剿敗殘無多期之歲月必能得手

聖主可釋西顧之憂

微臣

當以總輔爲急現已傳知郭松林周盛

傳等督催各營速整行裝剋日分起啟程臣擬先帶馬步親軍八

營於初七路由西安進發至潼關渡河取道山西馳赴近畿一帶

擇要駐紮屆時請

旨遵行一面咨商署湖廣督臣李瀚章趕飭後路各營局改道解

運餉銀軍火以期接濟無誤其陝省防剿事宜遵卽知照左宗棠
將志章妥籌辦理所有酌帶各軍剋日啟程赴直隸由謹繕摺由
驛六百里加緊覆陳伏乞

皇太后

皇上聖鑒訓示謹

奏

質訊津案辦法片

同治九年七月初五日

再法使羅淑亞必欲將天津府縣立即正法據其照會內稱所聞所查實由府縣幫同行兇又稱有主使動手之人經會國藩等據理駁斥該使尙悻悻不平臣查外國審辦命盜重案必以證據口供當堂質對確實反覆研究乃能定讞與中國明慎用刑之意略同竊料該使到津後必有洋行買辦通事及習教無賴之徒從中簸弄以致顛倒失實若僅空言駁斥徒激其怒而啟其疑此案終難安結

臣愚擬請

密飭毛昶熙崇厚等詢明該使所聞得自何人所查得有何據須將如何幫同主使證據交出由中外大員會同提集該府縣當堂質訊必如外國辦案兩造俱肯認供毫無抑勒翻異乃可成信讞而服眾心果該府縣有此實在重情亦不能曲爲寬貸也儻該使

竟不交出證據或不肯傳往會訊是其情虛而兇骸亦當漸減該
府縣張光藻等想必遞有切實親供應由該大臣等相機照會法
使仍趕緊訪拏真正兇犯迅速議抵較之空言抵制或者稍易轉
圜臣相距太遠於局中情形未能深悉姑就愚慮所及冒昧瀆陳

伏乞

聖鑒謹附片密

奏

請飭劉銘傳籌辦軍務片

同治九年七月初五日

再前直隸提督一等男劉銘傳上年因傷病復發奏請開缺調養臣今春疊有黔陝之役曾面商該提督能否力疾視師據稱邊患尙非甚急若至軍情喫重義當復出等語查劉銘傳歷剿髮捻各逆紀律嚴明威望素著其才器智略可當一面尙在楊岳斌鮑超之上所部銘字馬步各營經曾國藩奏交劉盛藻丁壽昌接帶拱衛

畿輔現在事勢緊急該提督深明大義分應投袂而起稍助聲援臣已飛函敦勸該提督寄居安徽六安州可否請

旨寄諭該提督克日兼程赴營並幫辦臣處軍務將來如有他處征討該提督堪膺重寄但使糧餉無缺必不致有獲軍債事之虞臣爲籌備將才起見附片據實陳請伏乞

聖鑒訓示謹

奏

籌辦轉運並催協餉片

同治九年七月初五日

再臣所帶各軍自春徂夏奔馳未息疫病頗多現值盛暑休兵之際緣近畿一帶事勢緊急奉

飭迅速前進臣激於義憤斷不敢稍任遷延惟臣軍所用半係外洋軍火輜重甚繁沿途車驟缺少轉運不速卽抵直以後倉猝布置遠道疲乏諸難齊備誠恐有誤事機實深惴懼除已咨行山西河南直隸各督撫轉飭所屬經過地方趕緊籌備照料師行外又北路連歲歉收糧草艱貴臣此次億億就道未及豫籌惟賴各省協餉源源解到俾可應急擬請

旨飭催江蘇浙江各省將應解臣軍額定月餉照數接續籌解並懇

敕下四川督臣將月撥三萬兩逕解湖北糧臺轉交山東撫臣將

月撥二萬兩就近委解劉盛藻銘軍營中收用以維大局理合附
片陳請伏祈
聖鑒訓示謹
奏

袁保恆赴直效力片

同治九年七月初五日

再據辦理西征糧臺翰林院侍講學士袁保恆咨呈稱竊保恆恭閱邸抄知天津民教構衅洋人受創甚鉅積怒甚深知必有非理要求兵船挾制之事私憂竊慮寢饋不安伏念保恆世受國恩無可圖報既聞

畿輔有警凡可以分

君父之憂效馳驅之力者義當不避艱險慷慨赴之竭蹶趨之當聞信之始卽擬具摺奏請馳赴直隸聽候驅策稍效愚誠茲聞臣率

旨馳赴直省想係夷人狡逞軍情緊急私懷懸戀

闕廷益覺食不下咽請臣附驛代達惓忱仰求

恩准效力畿疆俾遂捍衛之義以伸忠愛之私至保恆現辦西征

糧臺經陝甘督臣左宗棠奏明專司催餉一切均有頭緒接手之人不至爲難查有太常寺少卿王家璧品望素優老成勤懇現在西安亦係奉

旨歸左宗棠差遣位屬京卿與各督撫咨函往來提催軍餉體制相宜可以接管又保恆兼管甘捐總局隨時咨請戶部核獎王家璧併可兼管如慮核算事煩查有現管軍需局知府沈應奎句稽精敏可以幫同料理此外並無經手未完事件如蒙

俞允朝受

命夕可交卸清楚亦不致有遲延保恆辭易而就難辭逸而就勞實係迫於血誠不能自己除咨請

欽差大臣左宗棠查照酌核轉行外理合瀝誠咨請附奏等情前來查袁保恆於七年四月奉

臣發交臣營差遣見其勇於任事能耐艱苦聯絡各軍商酌機宜
於兵事亦有閱歷臣昨行抵西安該學士面稱風聞天津民教滋
事畿疆恐有警變擬自行奏請募兵赴直稍盡捍衛之誠臣當以
接據天津道府丁壽昌等來稟六月十九日羅淑亞與曾國藩初
次相見語氣尙爲平和並未過肆要挾暫宜靜候等語阻之茲聞
臣奉

命赴直復咨請代奏各情實出於報效惻忱臣未敢壅於上
聞應否准其前往之處伏候

恩旨轉行知照至太常寺少卿王家璧現在西安可否令其接辦
糧臺催餉各事除咨請左宗棠查奪外理合附片據情代陳伏乞
聖鑒訓示謹

奏

譚仁芳所部留陝片

同治九年七月初五日

再臣援秦時帶來周盛傳郭松林兩枝之軍並調鄂軍記名提督譚仁芳所統仁勝步隊七營馬隊兩哨除飭分二營於荆紫關武關龍駒寨扼守後路兼護轉運外其餘五營留紮西安現在陝省雖無猘氛惟甘境毗連時虞乘虛竄擾譚仁芳昔隨將軍多隆阿轉戰關中情形頗熟謀勇可用撫臣蔣志章商請酌留該軍暫紮秦境稍壯聲援臣卽檄飭該提督嚴束所部認真防剿聽候蔣志章調遣所有該軍餉項陝力拮据暫難籌應臣並咨商署湖廣督臣李瀚章湖北撫臣郭柏蔭飭局查照定章源源籌濟按月由陝西軍需局派員赴襄陽接解卽由陝局照章代放俟陝省軍務大鬆或餉力稍寬再由李瀚章與蔣志章妥商辦理以顧大局所有酌留鄂軍協防陝境緣由理合附片陳明伏乞

聖鑒訓示謹奏

勦軍報捐欠餉請廣四川學額片

同治九年七月初五日

再已故湖南提督楊鼎勦所統勦字一軍隨臣攻戰多年同治三年七月以前欠餉除發給餉票外仍欠銀二萬九千六百兩有奇其三年七月以後積欠餉銀爲數甚鉅該營將士承楊鼎勦遺囑稟懇全數報捐惟勦軍弁勇半隸江皖半隸川省擬請一半歸江蘇安徽兩省以一半歸四川分別加廣中額及四川成都華陽兩縣學額等情當經劄行糧臺報銷局司道會議詳辦去後茲據撥稱勦軍六營截至同治六年十二月底止積欠薪糧銀數共一十六萬六千二百六十四兩四錢六分六釐一毫二絲一忽查定章凡一州一縣捐銀至二萬兩者准其酌加文武學定額各一名等因詳請核

奏前來臣查勦軍官弁勇丁其體時艱願將歷年欠餉全數報效

實屬深明大義自應准如所請分半先行加廣四川學額合無仰

天恩飭部查議准以八萬兩加廣四川成都華陽二縣永遠文武學額各二名其餘報效銀八萬六千兩有奇江皖兩省既無專屬之縣加廣學額而銀數又不敷加廣中額擬請敕部存記俟淮軍續有報效銀兩再行併計彙辦以符定例除將欠餉實數分晰開單咨部外理合附片陳明伏乞

皇太后

皇上聖鑒飭部核議施行謹

奏

周盛傳北山疊勝摺

同治九年七月十四日

奏爲周盛傳一軍剿辦北山土匪潰勇業經就緒疊次戰勝收撫情形恭摺仰祈

聖鑒事竊臣於五月望後馳抵潼關查知陝境尙無猖氛惟北山宜川洛川一帶土匪潰勇股數甚多到處糾聚搶掠民姓安業路絕行人當經飭派湖北提督郭松林所部馬步山陝省進紮三原邠乾等處以防隴徇內竄記名提督廣西右江鎮總兵周盛傳所部由同州進紮韓城邠陽並令貴州安義鎮總兵唐仁廉所部二營分紮澄城就近歸周盛傳總統調遣分進北山搜剿土匪周盛傳於六月初八日由韓城拔隊前進十一日至宜川縣城探聞賊勢近頗猖獗初三日攻破距縣九十里之孔巖寨仍聞攻左近兩寨大肆焚掠當率兩營選鋒八百人連夜趕進越嶺數十重行七

十里至巖底鎮就寨洞稍憩天明大雨申刻雨止復行抵孔巖寨據民人訴陳燒殺情形甚慘遂派隊擒獲土匪數名供稱總頭目係戴得勝陳大帥馬大漢趙玉等距此不遠十三日傳發甫畢正擬向馬尾溝進剿忽接報潰勇已由棗園向老澗鋪遁去該處徑嶺叢雜尾追不及訪覓土人山小路河兒溝越嶺而過可抄賊前行三十餘里偵知賊股盤踞山村殺牛造飯周盛傳督隊猛進該匪膽敢悉眾迎敵勢甚兇悍我軍鏖戰逾時矛桿先交洋鎗繼發勇氣百倍賊紛紛敗退副將周家泰由左包進周盛佑由右抄來乘勝掩殺追過大嶺該匪拚死回闕我軍再接再厲賊益瓦解四潰連越九峰頭皆峭壁懸崖弁勇猱附而登賊墜崖死者無數追五十里始令收隊計陣斬及倒斃溺谷約三百餘人生擒百餘名奪獲洋鎗八十餘桿小鎗百餘桿馬牛驢三百餘匹賊之輜重

器械拋棄殆盡周盛傳又派提督衛汝貴統右軍扼紫石臺寺探
剿十五日探知陳大帥一股在十梅溝是夜帶隊疾進比至該處
賊已驚覺准情迎敵衛汝貴分路埋伏眾向前衝突我軍急起
擊之賊大亂沿山狂奔勢掩捕斃百餘名生擒二十餘名內有
陳心鏡係陳大帥弟也二十日唐仁廉與統帶盛左軍提督賈起
勝偵知匪首趙玉一股竄踞松樹屯黑樹梁等處唐仁廉派副將
舒拜發譚清遠帶隊往剿二十一日馳抵驛子梁瞭見山下有騎
賊數名後隨二百餘人因整隊急擊之賊棄鎗械牲畜北走追二
十餘里陣斃三十餘名生擒五十餘名內有賊首趙玉訊係四川
人賈起勝亦有斬擒並放回擒賊唐玉田張姓二名諭降夥眾二
十五日追抵磚廟鎮及之斬擒六七十名二十六七日衛汝貴四
起勝復搜剿老虎溝白雲洞一帶獲老幼婦女多人唐仁廉追往

開家山遇土匪百餘擊斬過半並獲著名刀客王馬成奪器多件
總兵姚禮士由老集進如意川擒斬二十餘名奪騾驢三十餘頭
復擒巨匪王三辭孜副將周盛鼎連獲賊眷並誘擒賊目紅刀手
強老八等於是降者踵至周盛傳偵知蟒頭山一帶向爲匪窟戴
得勝馬大漢等出沒無定帶隊往捕賊已他遁遂派衛汝貴尋蹤
掩擊七月初二夜追至祿兒川官頭村及之副將張兆海扼截去
路無首從盡殲焉戴得勝之叔戴三亦斬於陣生擒五十餘名訊
據擒賊供馬大漢已投崖死是日唐仁廉亦在六子坪地方搜斬
多名並獲匪首劉老十卽劉化山賈起勝復派降賊引路至山硯
內圍捉無數並誘降戴得勝全股周盛傳當將匪首戴得勝趙王
劉老十等訊明正法餘眾分別斬釋安置業經就緒據該鎮等稟
報前來臣查渭勇土匪數股合計不過三千餘人以宜洛山僻爲

賊匿之奧區以澄邵韓白爲掠糧之熟徑間受困非淺經周盛傳分派各營環紮兜剿無論深巖邃谷風雨晝夜尾其行蹤窮其蹊徑該匪東奔西突總不出我網羅六月十三之戰俘斬已多節次搜捕擒殺又不下千餘人先後降者數百餘則三五逃潰或倒斃崖澗或散投民家各營分路抄洗據報已無成股之賊地方漸就肅清記名提督右江鎮總兵周盛傳記名提督安義鎮總兵唐仁廉記名提督賈起勝衛汝貴冒暑轉戰擒渠解脅動合機宜可否請

旨將該四員交部從優議敘以示激勵

臣現奉

命移師馳赴近畿一帶周盛傳所部從征最久實爲百戰勁旅前已奏調該軍隨同赴直日內已由韓城拔隊分起渡河北山巨股既殲餘匪不至爲患

臣

已咨商陝西撫

臣

蔣志章附派三五營分

紫要隘與地方官妥商鎮撫招徠賑墾可期日有起色所有周盛
傳一軍勦辦北山土匪潰勇業經就緒情形謹繕摺由驛馳
奏伏乞

皇太后

皇上聖鑒訓示謹

奏

分路進兵片

同治九年七月十四日

再臣於初五日覆陳先帶馬步親軍八營初七日由西安進發當經備齊車輛晝夜趲程十一日行抵潼關適值雨後黃河漲發風水溜急渡船稀少暫催各營輪替東渡數日乃畢臣即於十四日過河繼進擬由晉省取道并陘入直並飭周盛傳所部馬步各營由韓城宜川一帶分起渡黃至平陽先後會齊與臣同進近畿北路郭松林一軍於初九日由西安拔行臣飭該提督統率所部由潼關取道陝州洛陽過河至衛輝彰德暫紮擬進近畿南路與劉銘傳所部銘軍相為犄角援統俟抵直後再由臣察看情形候旨調派所有分路進兵緣由附片具陳伏乞

聖鑒謹

奏

行抵直境分兵邊界摺

同治九年八月初四日

奏爲行抵直境遵

旨派兵分紮晉豫邊界恭摺仰祈

聖鑒事竊臣由潼關渡河入晉業於七月十四日馳報在案途次
疊奉七月十八二十等日

諭旨飭將所帶各營分紮直隸邊境獲鹿一帶及河北彰德山西
平定等地方臣先已檄飭郭松林武毅全軍山陝洛過河暫紮彰
德衛輝等處周盛傳所部由韓城分起渡黃至平陽會合齊進茲
查山西平定直隸井陘一帶山徑險狹糧草艱貴不宜屯紮多營
因令周盛傳統率馬步各隊暫紮平陽洪洞等處休養操練臣自
率親軍八營按站前進於八月初四日行抵井陘擬即赴獲鹿暫
駐就地籌辦糧運以濟軍食抑臣更有陳者欽奉

密諭現在天津之事未即決裂若調兵信息早爲洋人窺破必致
又生疑忌等因查官軍越境遠役與營中出隊情事不同若朝發
夕至原可聲東擊西故爲不測茲由陝人直二千餘里人馬二萬
有奇後路調撥餉械軍火前路籌辦車馬糧料有一不備不可行
軍洋人教民布滿內地豈能處處掩人耳目臣此次迫於六月二
十八日

嚴旨倉猝成行幸而天津和議可就不至遽有戰事若稍決裂我
軍遠來疲乏糧餉軍火布置諸難齊備深懼無以應敵負咎滋重
夫用兵之道與馭火之法皆須虛實奇正互用洋酋好爲大言內
怯多疑遇事專講利害強弱臣嚮在江南辦理交涉棘手事件往
往兵威稍盛彼族氣餒稍減議辦亦易就緒蓋嚴兵衛正所以保
和局也前曾國藩奏稱因無備之故辦理過柔寸心抱疚臣奉

命帶兵赴直何可仍以無備而往即使調兵信息各處傳聞爲洋人窺破或轉因其疑忌而中外和議可以速成非理要挾可以裁抑彼既挾兵船而來似不能禁我之不調兵彼若先開礮則先開衅非我調兵卽放衅也況此次和議成後中國諒非永不設備若果認真設備洋人亦不能毫無覺察無論其覺察與否疑忌與否當先盡其在我勿予以無情無理之口實略示以不茹不吐之風裁目前天津之案必爲孳犯賠堂日後自強之策必求練兵製器理與勢兩不偏廢庶與大局有裨臣已遵旨分飭各軍遠紮晉豫邊界所慮一旦有警呼應不及愚昧之見不敢不預爲陳明謹繕摺出驛馳

奏伏乞

皇太后

皇上聖鑒訓示謹
奏

調任直隸謝摺

同治九年八月初八日

奏爲恭謝

天恩仰祈

聖鑒事竊臣於獲鹿縣行次接准兵部火票遞到同治九年八月初三日內閣奉

上諭直隸總督著李鴻章調補欽此當卽恭設香案望

闕叩頭謝

恩訖伏念臣才識疏庸展膺疆寄自去春蒞楚以後使蜀援秦馳驅不息在任之日少在外之日多地方吏治愧未能盡心整飭悚惕方深茲蒙

簡命調任畿疆值海防喫緊之秋正臣職難寬之日惟畿輔要區爲

皇都拱衛根本大計綱紀攸關稍存瞻顧之心卽昧公忠之義現
在津案未結河工待修凡柔遠能邇練軍保民諸事皆當規畫閔
遠非老成碩望如曾國藩不足以資鎮撫特以江表巖疆東南財
賦亟須得人而治臣雖樛昧何敢畏難諉卸上負

聖明惟有勉竭愚忱一守曾國藩舊章實力講求倍矢兢惕以圖
報稱而慰

宸廑除俟接篆後恭疏具報應辦事宜次第籌畫詳奏外所有微
臣感激下忱理合繕摺恭謝

天恩伏乞

皇太后

皇上聖鑒謹

奏

布置後路擬暫駐保定片

同治九年八月初六日

再臣於初四日行抵井陘當經奏明暫駐獲鹿茲蒙

恩調任直隸欽奉

寄諭著卽馳赴天津接篆所部各軍仍飭於直隸獲鹿及河北彰德山西平定等地方分紮以防狃匪竄擾爲名不可稍動聲色正定一帶聞有游勇滋鬧洋人教堂著飭各營將領就近彈壓兵民毋得從中構衅儻有假冒該營勇丁及別處游勇藉端滋事者並隨時訪拏懲辦等因欽此臣自入晉境接奉疊次

諭旨聞津案漸有就緒卽分飭郭松林一軍暫紮河北彰德周盛傳一軍暫紮山西平陽並未稍動聲色昨據郭松林途次函稱河朔水災彰郡聞無多糧恐軍食難繼俟到彼察奪或就運河附近屯駐藉購南糧周盛傳稟稱陝省北山土匪潰勇剽除淨盡後卽

移師分起渡河前隊於七月二十五日行抵平陽遵飭擇地分紮就食晉省代購米麥惟距直稍遠當枕戈以備啟行各等語臣均

遵旨飭令該提督等持以鎮靜聽候續調至正定教堂一節臣於初三日過平定州接總理衙門函稱七月三十日法國德繙譯官面述正定教士面告城內訛言繁興欲與教民爲難又有勇丁放言騷擾關係臣帶來弁兵路過該郡等語其時臣軍均尙在晉西距正定甚遠並無一人一騎前往直境何得先有路過騷擾之事臣沿途所過地方查拏游勇滋事搶殺不少營規尙爲整肅惟恐別處弁兵冒充臣營造謠生事當經飛飭正定府縣嚴查懲辦去後據正定府劉秉琳等稟覆該教士戴濟世七月初旬已他往留洋人梅慎思等兩人代管教堂在城居民並無訛言亦無游勇滋擾

等情適正定鎮總兵譚勝達迎謁臣於固關面詢該處靜謐如常
兵民與教堂毫無干涉自係聞臣將至豫爲驚疑噶制之詞彼族
恆情固無足怪臣擬率親軍馬步先至保定布紮略爲休養料理
一切再行赴津接篆謹附片詳細由驛覆陳伏乞

聖鑒訓示謹

奏

起程赴津並陳教案情形摺

同治九年八月十九日

奏為遵

旨迅赴天津恭報起程日期並籌大略情形仰祈

聖鑒事竊臣承准軍機大臣密寄八月十五十七等日欽奉

上諭著即馳赴天津會同曾國藩丁日昌成林督飭辦理並奉十

五日明發

諭旨一道臣於十二日行抵保定將親軍各營布紮休養料理後

路糧餉軍火轉運事宜接見司道諮詢地方切要利弊甫有端緒

臣體素羸弱自夏徂秋督隊冒暑馳驅感受溼熱加之憂念

國事寢食頓廢肝疾增劇正在服藥調理擬稍復元赴津接篆疊

蒙

明詔敦促職居疆吏何敢稍有諉延茲定於二十二日起程赴津

聞陸路阻水多處擬掉小舟循大清河東下約計五六日可抵津
郡再行察酌情形會商妥辦准曾國藩函稱現獲各犯認供可正
法者七八人應分別議罪者約二十餘人擬於二十三日先行奏
結等語該督臣亦知洋人傷斃較多要犯議抵辦不及數難免饒
舌惟津民萬眾齊心狡賴又事後深知悔懼或遠颺無蹤或堅不
吐供不比一家一人之事可以儘數吹求無礙大局自丁日昌到
後窮搜力索捕治已極認真事關動眾尤慮刑偏株連附會羅織
致成冤獄而激眾怒不獨非中國政體所宜卽揆諸各國平素道
理不肯輕易殺人傳教專爲行善之意亦微有不合所期日後與
民相安豈在一時快意仇忿若欲以示警戒正法八人與議罪二
十餘人辦法不爲不重遠近必皆寒心臣竊料以後各處不至再
有此等巨案若殺戮太過實爲洋人永遠之患尤非各國厚待中

國百姓之心想總理衙門王大臣必已與各國使臣詳切開導矣
臣力所能及當隨時督飭地方官設法訪拏訊辦斷不肯略存袒
護致令洋人含冤亦未便過事苛求轉令百姓解體愚昧之見是
否有當謹繕摺由驛馳

奏伏乞

皇太后

皇上聖鑒訓示遵行謹

奏

分撥駝隻片

同治九年八月十九日

再臣春開督師赴陝以糧運艱難請由綏遠城將軍定安采購駝隻二千匹解營應用旋准定安咨稱該城產駝不旺奏請

飭由察哈爾都統文盛在於察哈爾西林果勒捐駝內湊撥嗣因移師赴直函知文盛就近酌解茲奉八月初九日

上諭據文盛等奏勸捐駝隻足敷二千應否全數解赴直隸抑或分撥陝西以資轉運之處著李鴻章酌量情形咨照文盛妥爲撥解等因欽此遵查臣所部各軍現紮數處均距後路遼遠糧械軍火等件分途挽運需駝正亟惟陝甘督臣左宗棠督飭各營進攻金積兼圖河州正在攻勦喫緊之際該處糧運艱阻駝騾缺乏尤應分撥協助謹遵

旨酌量情形於此項捐駝內分出一千隻請由文盛徑解保定以

便分給劉銘傳郭松林周盛傳各軍之用其餘一千隻卽由文盛就近委解綏遠城交將軍定安驗收聽候左宗棠撥用除分咨文盛定安左宗棠查照外理合附片覆陳伏乞

聖鑒謹

奏

請撤古北口馬隊摺

同治九年九月十九日

奏爲調駐古北口馬隊官兵擬請酌量撤回歸牧以節餉需恭摺仰祈

聖鑒事竊查接管卷內前督臣曾國藩承准軍機大臣字寄同治九年七月初十日奉

上諭庫克吉泰奏遵調蒙兵需用經費請飭部籌撥一摺此次調撥東三盟馬隊三千名赴古北口駐紮聽候調遣需用行裝鹽菜等項銀兩著戶部卽行撥銀十萬兩解往熱河交庫克吉泰收存俟該蒙兵到口後一切需用款項卽著樽節支放以昭覈實吉林黑龍江馬隊到口後著仍遵前旨一體兼顧該官兵月需餉費甚鉅著曾國藩庫克吉泰會商奏辦其駐口聽調應行支發口糧著戶部覈議章程具奏等因欽此又於八月二十二日接准庫克吉

奏咨稱部撥銀十萬兩於八月十一日解熱該官兵所需俸賞行裝等銀遵於部定一半之半減放約計在五萬兩之譜無論何時飭調起程卽照章給發自應先由部撥銀內預行扣出存儲以備臨時應用下餘五萬兩該官兵分起到口應以駐紮之日起按起核發口糧以三盟吉黑各官兵統計一箇月約需銀四萬兩現計餘銀不敷兩箇月之用卓索圖盟頭二起官兵四百餘名已於八月初十一等日到承德其餘尙無定期若俟一律到口核明細數再行咨請等語恐有待餉之虞先行咨明應由何項籌撥裁酌會

奏等因在案曾國藩未及核辦移交到臣伏查此項馬隊官兵調紮古北口原爲預備不虞現在津案已有就緒瞬息冬令河凍洋船不至滋事而邊外猖匪更無竄越酌度時勢古北口一帶似不

必駐紮重兵且餉需繁鉅直省瘠苦無款可籌若俟各隊一律到
口輾轉撥解誠恐貽誤軍食辦理殊多掣肘卓索圖盟馬隊雖已
全數到防其餘蒙古各起及吉林黑龍江官兵未知已否起程行
抵何處擬請

旨飭令撤回歸牧以節軍勞而省餉款儻必須酌留備用或於已
到馬隊內暫行挑留精銳若干名其未到各起仍飭折回歸伍應
需月餉俟前撥十萬兩支發告竣請由戶部籌款接濟並

敕下庫克吉泰遵照嚴實妥辦臣爲酌度緩急節省餉需起見是
否有當理合恭摺由驛馳

奏伏乞

皇太后

皇上聖鑒訓示謹

劉銘傳請

陸見片

同治九年九月十九日

再臣欽奉八月初三日

寄諭提督劉銘傳久經戰陣忠勇性成聞召卽行尤非諸將所及該軍現紮滄州靜海一帶著曾國藩傳知該提督馳赴該營督飭將士勤加訓練以備折衝萬一洋人難以理論衅端自彼而開朝廷必假該提督以事權用展其才如此事卽有轉圜無須用武屆時當令李鴻章傳諭該提督來京陛見等因欽此該提督劉銘傳感激

皇太后

皇上特達之知兼程北上業於八月十六日馳抵滄州軍營督飭所部將士勤加訓練臣前已附片

奏報在案茲劉銘傳聞津案緝兇議抵就緒和局可成遂輕騎赴

津晤商曾國藩與臣以戀

闕情殷遵

旨赴京

陛見恭聆

聖訓等情懇爲轉奏前來臣查津事辦理大致粗定察看洋人議論似有轉圜瞬屆冬令河凍暫可無須用武該提督自應乘此閒暇籲請

陛見稍伸積年忠愛之忱

聖主留意將才優容逾格儻蒙

賜以召對

訓勉其所不逮榮幸曷任理合附片陳明伏乞

聖鑒謹

奏

李文忠公奏稿卷十六